

四庫全書

集部

欽定四庫全書

東萊詩集卷十七

宋 呂本中 撰

聞蔡九弟十四弟到行在

苦懷吾表弟別久費相思愛客能忘酒長貧不廢詩每
蒙高士喜終少貴人知試問游吳興何如在蜀時

贈蔡九弟十四弟

年來疾病日衰頹忽報山中兩弟來徑欲相從營一醉
未須辛苦便輕回

病中

貸米供晨炊尚欠數束薪平生甘此味此去未為貧
新霜已嚴厲况我病經旬但守此心足無為思古人

病中曾端伯見訪

不見倉曹十五年江城相遇各華顛何時更踐隣
居約判斷諸方五味禪浮生擾擾亂初定久病昏昏
開始便欲問小童尋大隗勝于猛將畫凌烟

無題

一任衡門可雀羅時容歌枕聽懸河因君小試屠龍手
要與午窓降睡魔

送曾吉父

吾道從來到處窮八珍常與一簞同子房故是青雲士
圯上乃逢黃石翁聖學有傳為可喜宦游少味自無功
亦知湖嶺如江湍盡在先生指顧中

次曾吉父蘭溪三絕

夜窓相對不成眠苦為離愁定不然政以蒼生未蘇息

思君日夕望回船

春信先尋嶺上梅
兩年零落待君開
非關使節須重到
自是溪山未遣回

久覺藏身不厭深
蕩游風物要追尋
書來肯附銅魚使
記我今年病不禁

窮臘有懷

冰霜抵窮臘
伏枕久亦倦
思公如和風
咫尺未得見
人生無賢愚
各自有志願
但得所趣同
公固不我賤
何須

肱九折始見金百鍊平安望中原棲息各異縣尚欲從
公游衰年保窮健

病中聞諸范日赴飲會

諸公相隨日酣飲我病昏昏困衾枕人生苦樂故不同
世味再尋如拾潘良醫更在肱九折曾子從來日三省
不離方丈走諸方萬事只如驢覷井

深居

深居如山林初不識城市塵凝喜事少犬吠知客至生

涯付衰疾日力破昏睡欣然一笑足自省甘若薺收身
當在早過此恐少味

慶大悲閣成

自離閩嶺罷叅禪疾病深藏不計年尚得聞人相印可
隔門惟有白衣仙

贈人

堅卧因循欲過冬故人無復馬牛風得君好句能忘病
笑我長饑不諱窮清夢肯嫌齋舍冷破囊常伴酒杯空

新正所願長窮健剩作歌詩準備公

送廣東漕范子儀

我為三衢居君作番禺行君行我方病歲序仍崢嶸嶺
海未寂寞斯民則憔悴得君鎮臨之固可以卒歲嗟君
盛德後窮獨與我同比年數見之長在寒苦中番禺盛
賓僚莫如元帥賢君行問安否道我如昔然

夜聞諸生讀書因成寄趙十七姪

紛紛樂裏了新正北望蘭溪不數程且喜諸生會勤苦

夜窓如子讀書聲

夜坐

所至留連不計程
兩年堅卧厭南征
荒城日短溪山靜
野寺人稀鶴鶴鳴
藥裏向人閒自好
文書到眼病猶明
較量定力差精進
夜夜蒲團坐五更

簡李巽伯

愛酒舊無敵
能詩新有聲
荒城時過我
長句屢尋盟
厭病時招客
因行不計程
祇應有餘暇
未肯賦閒情

一本後四

句云往事十年夢生涯三尺
紫却憐陶靖節著意賦閒情

追憶昔年正月十日宣城出城至廣教

嘗憶他年在宛陵好山松竹面層層江城氣候猶含雪
草市人家已掛燈每怪愁腸難貯酒時隨拄杖出尋僧
如今轉覺衰頽甚病坐南窓冷欲冰

病中上元

病久仍多事深居未識春殷勤今夜雨且為阻游人

三衢上元

俗事紛紛避作煩夢中時厭雨聲喧但看閒客時來去
勝說羣兒手覆翻事業不同俱可笑形骸如此尚何言
他年更有相逢話同是三衢過上元

贈人

刺作閒官不計年得公相近轉脩然飽諳文字能生病
始信虛空不住禪水澁船回休進棹路長馬倦莫加鞭
漫成拙句為公壽要作新正第一篇

官閒贈人

自喜閒官不計員月叨微祿勝歸田藥囊往往充詩藥
米券時時當酒錢忍病作勞吾不厭對人無語子差賢
不須更見盧溪老會得安心即是禪

正月十七日

令節今安在晨鐘奉夙興空庭留素月廣殿有殘燈笑
語已難記經游如未曾吾衰得堅卧差勝住房僧

病中得舍弟信

頻通婺女訊兼得會稽書歲月呻吟裏文章困睡餘百

年判憔悴萬里付迂疎尚欲身強健相從得定居

疥

瘡痒撓膚無春冬為害畧與惡疾同只有瘡痂不相負
夜闌長滿寢衣中

正月十九日暴熱

一夜飛蚊遶鬢鳴却忘時節是新正祇應朝暮須風雨
便作疎簷瀉竹聲

即事

十年不調張廷尉一字拔人山巨源萬事重尋已陳跡
此公相對可忘言故人久已音書絕古寺終嫌市井喧
更欲移家近深僻漫留書冊教兒孫

送向仲吉往江西

紛紛車馬鬧如雲膏火煎熬祇自焚亦有故人來問疾
苦無佳思與論文江湖老矣頻搔首毛髮脩然政似君
他日卜鄰猶有約靜中風景要平分

寄臨川親舊十首意到輒書不復次序

偶從行李轉江湖所至翛然一物無
午枕久拚閒事業
夜窓新有靜工夫

少小交游不乏賢二三豪傑聚臨川
自從老大飄零盡
獨有殘詩數百篇

屢試吳中千里蕁閩中荔子亦嘗新
獨游每恨無佳思
正好溪山少故人

故人自失嵇中散疾病衰頽轉不堪
猶喜閒居有賢弟

且隨長鋏住江南

季平

張卿別後且郊居無復黃公舊酒壚試問今年有閒暇
亦隨書劔入城無

文叔

交游疇昔住臨川博士高風世不傳饒謝得名三十載
當時已道小汪賢

叔野

故人子弟惟汪謝每一思之忘寢興莫道臨川便寂寞
後來相繼有諸曾

吏部聲名動一時中原人物未全衰低摧不用還歸去

坐守遺經可療饑

子禮

金谿比歲復何如
二董風流却未疎
聞道移家遠城市
欲攜書籍更深居

彦先彦速

愛賢如渴吳夫子
不染世間兒女塵
老病不逢終不悔

後生誰復記斯人

吳迪吉

奉懷季平范文戲成兩絕句錄呈

形骸已病尤宜懶
歲月長貧屢有詩
猶得深居少塵事
只如同在嶺南時

新年為況復何如
尚有心情打酒無
只恐後生行樂處

轉嫌吾輩白髭鬚

病中寄胡原仲劉致中

累月不寄書我病亦在床仰見出林鶴如覩二子翔冰壺貯秋月所至有輝光僻郡足風雨深春猶雪霜閩水遠而清閩山深且長何時一尊酒更復議行藏

才元相過三衢偶成近體詩一首奉呈

紛紛俗事起如毛病起南窓厭作勞正欲往來求飯飽敢將辛苦治名高長聞似稱三冬卧舊學虛蒙一字褒

他日相逢有餘地尚容哀晚關堅牢

無題

衾裯尚冷知春早意緒無聊覺病深夜半故詩綠底事
向來餘習正關心

寄人三首

世久無高識斯人我獨知子行吾義子雖病敢忘詩
念昔無事日同升夫子堂江湖晚相見猶喜共行藏
世久趨浮末于時爾獨賢閒游衆目外却立萬夫前老

驥空伏櫪長琴有斷絃傷心共隱地回首更茫然

寄祁居士

聞道祁居士抄書手未停艱難走異縣辛苦抱遺經野
寺猶堪隱人言懶復聽十年事夫子今日得儀型

贈人四首

病欲相尋久未能虎丘山下在家僧諸方本末須君記
拈出叢林舊葛藤

昔年曾侍老姑傍誨我全身只退藏長恐風流便疏遠

子猶他日及升堂

跬步無功已厭遲後生誰復肯從師無人識子閒居意
手冷深藏只自知

三江古路更深居白首窮經一丈夫借問新年入城市
亦曾頻到虎丘無

寄朱希真

幕下諸侯老微言衆不聽祇應有餘論時復注前經郡
古疎還往官閒任醉醒主人鵝可換更為寫黃庭

寄向縣丞

念子他時兩頰紅十年奔走變衰翁
耐官丞相風流在坐守簞瓢不訴窮

病中

藥裏關心老不宜只今筋力已全衰
何由更得身無事却似他時把酒時

山城

山城雨雪繁春氣來不早思君如和風
未見意已好時

蒙枉車騎笑語得傾倒我能知子賢子亦憐我老舊交
半鬼錄在者跡已掃慨然念平生令人惡懷抱相從飽
喫飯此計或未保東游有前約預恐別草草豈無一言
贈妙句寫默藁出戶仰高山猶堪慰枯槁

病夫

病夫坐穩懶出門底事逢春作癯瘦故人相尋不憚遠
欲以一盃為我壽鋪張古昔引大義勸使忍窮如忍詬
感君意氣但如昨顧我情懷已非舊平生甘作蟻旋磨

萬事只如船放溜十年參差故鄉夢一心守待靈芝秀
辱身竊比柳下惠疾惡幸逢朱伯厚他時城市望雲山
歲晚何由數相就

無題

心廣體故胖意肅氣自屏頽然萬物表樂此一室靜念
君久安坐轉覺此味勝疎籬過野馬破牖行日景但令
此意真不必費譏評想當溪山橫更有松竹映隱几得
晝眠此固可補病

偶成兩絕句奉寄文若庭列

強欲馳驅老不宜故人雖在費相思祇應大府多還往
職事雖忙不廢詩

夏子經時不寄書十年奔走尚窮途不知自到高安縣
亦有心情記我無

寄閩中親舊

濃陰蔽烈日小院有餘涼頓覺枕簟好時聞荷芰香秋
成今可必衰疾未相妨徑欲閩中去尋僧不裹糧

廖用中世綵堂

廖氏居七閩土俗變齊魯子孫仁且壽每繼先父祖作
堂名世綵此意天所予近者得矜式遠者快先覩今公
懷直道邪正有區處還家上此堂父祖當笑許小人慕
清風想像濯煩暑孰知少年場有此毛髮古何時望世
綵得聽公笑語老松卧歲寒亦以蔽風雨人或不予知
亦莫予敢侮

劇暑

劇暑先庚伏經旬在炮燔今夕驟雨過我病亦少安涼
風醒病骨好月上更闌尚恐賊報急凌風無羽翰關中
故人書日夜望我還無車載家具欲往故不難所恨去
已晚不及荔子丹家家有白酒自足解愁顏

即事

經旬困炮煮今夕有微風市井驚塵外溪山嘯傲中秋
涼亦不遠吾道恐終窮準擬關中士今年一笑同

秋日

斟酒莫辭酒。琺寬酒。琺少寬。令心安。客游無聊思。舊歡
舊歡。新愁千萬端。如何不飲空長歎。歲云秋矣。風落山
白露。應節衣裳單。南游並海。當不難。雨雪欲下。何時還。

懷秋

秋風日夜至。念我少年時。新涼喜欲舞。至今心未衰。心
雖未遽衰。老病則已甚。頽然坐前墀。乃若雨鳥噤。予病
少則爾。衰羸非獨今。徘徊以徬徨。何以異。夙心死者合
已死。空費子百慮。在者亦已老。契濶少相遇。洗心西方

觀子復未肯然胡然競日力今年如去年

贈范十八

君去留不得我窮前未聞如何出籠鶴更送離山雲歲
晚逢同志人稀莫離羣肯思臨別語只用十年勤

秋日

少年固長貧長歲復多疾閉門取堅坐到此多事日不
嫌冷如漿所要甘似蜜舊書堆几案老眼厭塗乙不如
壁角坐萬事付以實況今雨澤足已覺憂患失秋成日

在望所至有梨栗賊報雖未哀一飽良可必

讀書

老去有餘業讀書空作勞時聞夜蟲響每伴午雞號久
靜能忘病因行得出遨胡為良自苦膏火自煎熬

宿昔

宿昔尚煩暑平生悲遠游長貧不貫酒雖健懶登樓晚
節勞千慮經年走數州新涼事事好只是迫防秋

謝人送詩

堅坐少愉樂欲行還滯淫時蒙七字句可慰十年心歲
晚日晷短天寒霜雪侵主人不厭客敢避酒杯深

水仙

澹綠衣裳白玉膚近人香欲透衣襦不嫌破屋颼颼甚
肯與寒梅作伴無

破臘迎春開未遲十分香是苦寒時小瓶尚恐無佳對
更乞江梅三四枝

東萊詩集卷十七

欽定四庫全書

東萊詩集卷十八

宋 呂本中 撰

處暑

平時遇處暑庭戶有餘涼
乙紀走南國炎天非故鄉
寥寥秋尚遠杳杳夜光長
尚可留連否年豐秔稻香

教授鄭國材挽詩

松桂在荊棘所趨故不同
雖云被剪伐所至仰清風
念子行古道簞瓢生屢空
我來則已病不復能從容
平生

務躬行聖處久收功堅坐想顏子欲往吾其從丹旆忽
已遠暮靄千萬重論文一尊酒堅坐更誰逢

無題二首

柴門羅雀懶頻開喜有新詩到眼來聞道繫舟城脚底
莫乘溪漲便輕回

入秋多病渾無酒學道無成却讀書莫謂窮居便寂寞
天涼猶枉故人車

潘義榮惠木犀二首

年年無酒對新秋
辜負涼天懶出游
想得故人憐我病
故分巖桂洗窮愁

掃除炎暑脫氛埃
色似菊花香似梅
知是西風要清賞
少留陰雨候晴開

次潘都尉富季申冬日探梅韻二首

暑退園林物物新
過溪風好月初晨
酒壺茶具偏宜坐
細草殘花別是春
但得主人令客醉
不辭秋冷和詩頻
從來禮節生疎放
見我狂歌意自親

開府新從日下歸，却尋山水對烟霏。
剩披詩律留花住，不使親知到眼稀。
但見鯢鵬常遠舉，應憐蜩鷃只卑飛。
此游尚恨還家早，未許溪頭送落暉。

次韻木犀二首

折送幽花與做秋，溪頭風物未重游。
已憐多病逢三益，更喜詩成擬四愁。

洛陽車馬走塵埃，一歲顛狂自探梅。
還識此花風味否，年年秋後兩番開。

謝潘義榮送菊二首

經旬霖雨足莓苔忽喜雙盆送菊來已似風霜憔悴損
主人云是待晴開

漸開粉白間微黃肯與新橙一例香送與衰翁元未稱
且留青蕊作重陽

畜犬

主人長年閉柴戶終日閑雖云伴我懶常有跋扈志端
如在籠鶴又若伏櫪驥舉首望道路久欲從此逝恨無

陸探微寫此師子戲如何尚搖尾更作求食計

疥

刺刺齷齪疥欲作今年去年只如昨人生縱病莫病此
此病雖輕更作惡寒窓夜長燈燼落敗人禪觀妨人樂
安得壯士挽天河盡洗此瘡間處著

潦倒

潦倒心猶在哀遲分獨深如何一朝淚空費百年心好
月思同步清尊懶獨斟惜哉王子敬誰復嘆人琴

贈人

他年好兄弟見我嶠南時相對能忘病清言可療饑後
生寧復有末俗漫相疑尚想閒居處踈燈守破帷

無題

疾病侵凌我亦衰後生誰復更相知可憐日落長安路
不見驂騑整轡時

寄京口使君

使君鎮京口隱若一長城詩律有同社溪山聊主盟
窮

塵不挂念鷗鳥自忘情曾記貧交否衰頽判此生

再贈

嫠女勝京口公來歲已秋閒雲出山寺好月掛星樓往
事付情話故人多倦游十年浪奔走今日為公留

贈友

子來已冬深僅得數夕款寒窓聽談道未厭白日短從
來不飲酒萬事付茗盃別去今幾日荒堦月猶滿

歲暮

歲暮少懽愉况復嬰病苦閉門每厭客幸此連日雨寒
爐火復焰乃若相媚嫵披衣坐壁角妙處時一睹風聲
耿初夜有句或未吐還書問故人可復一笑許

戲成二絕句

老讀文書懶不前亦無餘地可逃禪閉門省事羣鷺遠
惟有狸奴附日眠

病犬虺隤惟附日懶猫藏縮可逃寒寧知兩馬霜風下
更有長途不道難

久病二首

久病畏人事長閒增道心寧貪風日好不避雪霜侵跼
躋身猶在高低手自斟酒盃休厭滿茗盃向來深
未愈俱生疾空懷宿昔憂時因發孤興尚足慰窮愁月
落初無念花開不自由如何雁南鄉不共水東流

偶作二絕

不嫌羸病守繩床世念紛紛久已降一夜月明如白日
驟聞急雨打天窓

膏火從來只自焚何曾野鶴駐雞羣如何死亦無公論
地下猶存衛府勲

謝滕尉送梅

破帷冷落不禁風疾病深藏稱懶慵忽有梅花來陋巷
喜聞春信出初冬未須趨雪爭先睹尚恐衝寒不滿容
會約君家好兄弟他年尊酒便相從

游山

世味日可厭茲游那得忘稻田疏宿雨木葉犯新霜
潦

倒交游在追隨氣味長僧窓有靜供茗盃有爐香

李丞相挽詩三首

舊學邈難繼相期從少年初看驥伏櫪遽作鶴冲天烈
節平生志高名萬代傳如何事未濟此老下黃泉

兄弟俱英妙聲名萃一門論才無不可於道獨為尊未
定千年策終嫌萬丈渾天乎乃如此不使拯乾坤

事業懷蕭相胸襟識謝安流風有餘烈志士只長歎淮
海他年竭冰霜此夜寒向來交友淚南望不曾乾

以一縑寄范四弟

中原厭兵馬所至無完窟
念君空懸罄何以備倉卒
窮冬霜雪繁欲救乃無術
兒號君莫厭婢怨君莫恤平生
師顏子于此見髣髴此縑君所知
自我機杼出

江梅

江梅消息未真傳
微露芳心几杖前
不信冰霜能作惡
要令桃李便爭先
斜枝似帶千峰雪
冷艷偷回二月天
準擬從君出城去
竹輿仍勝百花韉

鼓山頌法眼語在裏即求出云大家合眼跳黃河

戲成四韵奉答

合眼跳黃河未有過得者豈惟不得過身亦須判捨告
君過河妙止要具船筏乘時等風去過此無別法

夜深歸家聞隣家小兒讀書可喜有作

還家更寒三鼓餘隣家小兒猶讀書王侯將相乃無種
紈袴綺襦寧似渠北風颼颼霜被草聽汝讀書聲轉好
莫言翁媼惜膏油有兒如此可無憂

梅花

野水依城竹映沙江梅開處又人家
天晴徑欲花前醉只恐衰顏不稱花

無題二首

德盛不狎侮玄談多作俳居然少莊語
無乃近齊諧恨此達者趣猶乖
壯士懷故當先復禮方得盡梯階
聖學邈難繼斯文當望誰還能養志氣
且務攝威儀曾子但三省子長徒愛奇
從來要功處本不在多知

贈李元亮之子李子

往時諸李在江都文采風流一代無每得清詩如小謝
已聞前輩許封胡好松久已埋深澗老馬今猶憶舊途
令子相逢初未識尚容衰晚見規模

二月七日與羣從游陳氏園

平居羸病每相妨今日尋春有底忙何以至人常不出
看人衝雨度浮航

橋北橋南花亂開小園和雨掃莓苔不嫌拄杖衝泥入

更許乘閒著屐來

懷許子禮

寒松厭庭院老馬倦維繫
翛然出塵去粗免朝夕急我
友隔湖嶺尚作一日葺平生
學道心擇善有固執豈不
在行路自遠霜露濕百川
灌河來砥柱乃中立何時一
尊酒更與交舊集

雪

窮巷無人對雪小詩自可逃
禪看取一年三白喜歡共

入新年

堅坐正宜養病開門便當幽尋一夜雪深一尺與誰取
酒同斟

報暉庵

春草仰生活春暉常照臨不知欲報德何以見此心江
漢有時竭此心無淺深魏氏有令德傳家非獨今結庵
在山阿日瞻松栢林仁風被遠迹猛獸不敢侵令子守
直道意往無崎嶇遂令此鄉人得聞金玉音我行時序

晚回望西山岑延領長太息聊為純孝吟

贈莊季路

老矣莊夫子居閒肯厭貧
盛時更讀易憂道不無人
記往詩猶在相逢意倍親
尚期香火社文字約遺民

李尚書挽詞

李氏三吳秀尚書一代英
立朝惟直道守已但純誠
報國心雖在憂時病已成
人推四兄弟氣壓百公卿
未就養生術獨取強諫名
傷心舊游地城郭漫溪聲

李器之履齋

人履履險巇君履履平地平地信可履行穩居亦易責
已不責人為道不為利熟視履險者豈不心有愧君家
天台守固學有餘味微言化子姪自足警一世初無舉
足勞寧有半塗滯君能識其然我亦從子逝

野寺

曉窓日未融野寺雨欲作經旬少客到靜坐差可樂平
生遭病擾今更不如昨囊空畏高醫何以致良藥所幸

秋已至所在身可著洗耳聽涼風不待一葉落

辛酉立春

中原擾擾尚征塵堅坐江南懶問津漫讀舊詩如昨夢
却疑往事是前身子桑自了經時病原憲長甘一味貧
刺忍雪寒君莫病土牛花勝已迎春

雪夜

破屋除燈雪自明案頭無用讀書檠老慵已慣跣趺坐
昏夢尤便松竹吟知有故人來問道久無佳興與尋盟

明年更有閩山興但辦行纏莫計程

謝方倅惠炭

寒壓新春雪不融布衾如鍊坐衰翁煩君又送南山炭
更放殘爐一夜紅

即事四絕

老來于世轉無求事業聲名種種休伴得鄰僧忍饑慣
閉門無飯讀春秋

忽忽和夢別星樓擾擾隨緣住信州尚笑長江少方便

只教溪水暫西流

問柳尋花懶不知登山臨水病難為
日長客去松陰靜
強課兒曹學和詩

經旬却怕酒盃深野寺雖閒病至今
莫謂閒居厭醫藥
未妨隨證檢千金

贈人

中表多離隔情親子獨賢
心游衆目外氣出萬夫前
米賤猶堪飽官閒不記年
春風上巖瀨為我略回船

辛酉之冬周提宮墜惠行隔

深冬坐窮閭未厭風日惡今晨起濃陰正恐雨雪作故
人憐我寒垂意到丘壑虛堂排竹牖已覺暖勝昨初無
窮室勞漸有閒適樂我生甚易足所至况旅泊不為禦
冬計敢復備隕籜偶蒙仁者念僻處未蕭索從今作新
年對酒且斟酌

寄張仲宗

聞道張夫子今年已定居偶緣荔子債遂絕故人書歲

月足可惜溪山莫負渠他年得相近不必問庖厨

周仲固尚論齋

周侯不出何所為閉門讀書心自知簞瓢陋巷君不厭
讀書萬卷能忘饑上參羲皇下秦漢采取英華幾脫腕
是非榮辱姑置之忽若乘船到彼岸古人之學有傳授
君生寂寞千載後問君何以識古人袖手無言坐清晝
以此讀書為尚友是事渺茫人信否人信不信君不問
松栢固難生培塿朝來落葉亂荒城青山照人溪水橫

往來車馬作塵土想君深夜讀書聲

吉州段秀才栗庵

大千非有餘一粟豈不足須彌納芥子豈復論盈縮
今君住世網何以得此獨始知陋巷居已悟不遠復

自如齋

朝為事所奪莫為饑所驅不知六合間何人能自如
永新段夫子屋小有餘教之有家法逃禪猶作書

醉經堂

紛紛入醉夢一語令渠醒
段子閉門居云何猶醉經
其醉蓋非醉初無能解醒
問經何所說明善故能誠

題焦寺丞詩冊三絕

一世奔波在別離君家孝友獨天知己令好夢傳消息
更有賓鴻效羽儀

路旁來報定何人物理潛通自有神想得三衢相見地
至今草木亦長春

河朔家人墮渺茫江南風日正舒長已知原上鵲鴒處

更入雲間鴻雁行

暴物

暴物看日景頃刻未嘗停隨景移暴物日示令心驚寓
此不停景乃復望長生忽忽駒過隙悠悠池汎萍况茲
兵火中而每疾病櫻野寺過毒暑旱氣浮高城出門君
莫厭宿昔已秋聲

次葉守喜雨

羣囂寂寞已收聲預怯秋房獨夜情忽聽僧簷鳴宿雨

定知田舍舞安甯盡消積暑經時早不厭新涼數日晴
更喜此邦賢太守樂為詩頌教諸生

無題

學詩漸老轉銷聲末路蒙山此日情尚有文章能起疾
豈惟田里解虫忙近郊杭稻成秋熟繞郭溪山入晚晴
剩繞長廊和新句不知庭下薄寒生

次韻曾宏甫木犀

風吹旱暑未成秋辜負江村事事幽巖桂敢煩先折送

好詩仍不待邀求
自憐疾病常高枕
坐想風流換此州
他日出門尋舊約
未嫌踈懶作人不

贈鄭侍郎二首

便欲深居過一寒
破窓重覓舊蒲團
莫年生活如何做
子細煩公指示看

幾時不過西禪寺
直自初秋到晚秋
聞道主人憐我病
天寒猶未送新篋

東萊詩集卷十八

欽定四庫全書

集部

東萊詩集卷二十九

詳校官贊善_臣朱 紱

主事_臣呂雲棟覆勘

總校官進士_臣繆 琪

校對官典簿_臣劉景岳

謄錄監生_臣龔輝遠

欽定四庫全書

東萊詩集卷十九

宋 呂本中 撰

次曾宏甫九日韻

僧園曉色散棲鴟
強起新詩整復斜
正想故人披宿霧
忽蒙佳句洗昏花
舊游往往違心事
老病昏昏漫歲華
辜負重陽一尊酒
且來占雨又朝霞

九日贈曾宏甫二絕

茶花過雨十分香
山後山前已帶霜
何事東籬數株菊

已將青藜趣重陽

漸退中原戰馬塵溪山未厭往來頻雖無名酒酬佳節
尚有新詩答故人

送徐止秀才歸小葉

後生少規模子學有根源紛然衆室中獨識孔氏尊古
人雖不作此理固常存滄海無津涯寧有衆水分鑑明
不受垢垢盡亦無痕子還訪師友當自得其門躬行見
日用餘事不論文

次葉守韻

新正無所為出戶亦乘興欲尋林泉幽不避風雪迸搜
腸乞佳話分外若贅癭故知藜藿盤不受珍果飮清詩
洗病目鄙陋知不稱披雪見新月乃悟本來性溪山况
瀟灑復有松竹映何須待醇酒然後有酩酊

寄題曾黃州重修睡足齋

雲濤際天江北路郡古人稀春欲暮平生想像睡足庵
頗見王杜安身處十年兵火庵已壞草莽連崗穴狐兔

使君初來席未暖重就新齋立窓戶疎疎脩竹帶泉石
歷歷幽光點烟霧竹樓月波不寂寞雪堂東坡復共佳
昔者同遭盜賊擾今者定蒙神物護使君忘言坐搔首
抖擻衣襟脫巾履下簾高枕百吏散一任江頭風斷渡
會思王杜與新詩夢裏相逢得奇句

重陽前一日作

涼風策策旁江城道路猶寬遠去程秋晚情懷常索寞
夜長更漏轉分明未償臍腹三年艾不負膏油二尺檠

明日黃花一尊酒苦思親舊與同傾

春晚

春色忽已晚悠悠留此心
深居有閒暇令節廢追尋
更老愁何在長貧病亦侵
一盃聊自勸不為落花斟

寒食二絕

梨花雪白柳深青也似中原舊驛亭
猶記往來寒食下客房無酒卧空瓶

今年春物更怱怱野杏山桃取次紅
底事無錢作寒食

可無新語記車公

送曾宏甫知黃州四絕

雨餘天氣欲嘗橙
栗可煨炮芋可羹
正是一年秋好處
忍令無酒送君行

口脣白醖未嘗開
正始餘音挽復回
他日爐香為誰起
公曾親見了翁來

君到江頭不問津
雪堂草木幾番新
一生未得文章力
要掃中原戰馬塵

騏驥徐行不離羣却行江北訪斯文
潘何子弟能傳業
當奉遺書與使君

題范才元畫軸後

昔年曾過嶺南州爭看湘江萬里流
妙手可傳詩外意
亂雲寒木更孤舟

送尹少稷賢良還懷玉山

青松在庭檻乃受衆目憐念彼歲寒枝
肯爭桃李妍
不如卧澗壑歲久霜雪前
尹侯東州英炯若珠在淵
避地

走南荒因循留瘴烟歸來懷玉山草草屋數椽深居絕
萬慮讀書欲忘年偶出到城市頗厭塵囂煎搜腸出妙
語贈我以長篇行潦被注挹朽木煩彫鐫紛紛車馬間
孰能知子賢別歸值短晷肯復更留連我老百事廢鈍
馬難加鞭清霜粲屋瓦白雲常在天悵望子所居欲去
無資緣

閑居即事

新舊音書寂不來略無一事可縈懷春風寂寞花侵路

野寺荒涼草上堦
剩欲出門留客坐
不妨扶杖看僧齋
無人會得龐公意
只道淵明是正儕

偶出謝客

才過清明日更長
竹輿頻出度浮梁
雨侵田水連溪白
春入山花帶蜜香
數有故人相勞苦
不嫌俗事且窮忙
今年尚有湖湘興
不待秋風便促裝

蔬食三首

殺物以活已肉食固多慚
况無一事勤敢于滋味貪
今

晨病少間調羹有酸鹹居然飽笋蕨自足慰清饒
磨刀向猪羊渠有千種苦厨人盡心力博汝一笑許此
道在忠恕觀彼更觀汝聖人雖未言寧可自莽鹵

夫子釣不綱于理已不隱浮屠斷食肉此語說始盡人
生慣便習奉法乃不謹要當守淡薄萬事可堅忍

戒殺八首

勸君勿殺犬犬有為主心為主反見殺君何無淺深君
貧犬不去君富犬分憂執以付鼎鑊于君心穩否

畜犬被縛時猶為主
人吠吠聲不絕口湯沸主已退
主人調醯鹽欲以佐滋味持此望身安世間寧有是

犬雖有小過未至不得活賣錢與屠宰使得恣鬻割君
兒小不安君夜不得眠何獨于此犬如此安忍然

勸君勿殺鷄鷄能伺昏曉聞鷄君即起一一家事了一
朝被烹煮不念前日功主人取暫飽鷄苦固無窮

縱犬使殺鼠鼠窘生百畏其饑使之出此亦有何罪犬
鼠俱可殺莫計有無功苟以無功死還與殺犬同

願君普斷殺能益君壽數子孫亦長年皆以不殺故君子遠庖厨非有意于善但能觀自身此理即可見

商臣殺其父身亦烹楚國世民殺其兄亦未妨大福以此知報應未必在此時此時雖無他終久君試思

虎狼非不仁天機使之然蛇虺肆百毒此亦受之天願君勿憎怒憫此心謬用仁氣苟薰蒸終皆變麟鳳

寄祁居之

苦憶均陽祁處士只今全似住庵僧何時更得相從去

細話叢林舊葛藤

送韓念八迪功

君去留不得我行還未忙漂零更遠別衰疾且深藏野
水千山綠荷花一路香猶思往還地相望隔浮航

謙上人清湍亭

道人結庵殊未就先起小亭山左右不將溪水濯塵埃
且以清湍為客壽雲烟映靄作春濃草木堅枯辨秋瘦
客來相對兩無語豈有浮辭問時候一生行脚如夢覺

天意似于君獨厚我今留滯未得往想像此亭如故舊
再三伸紙誦清詩已勝開尊飲醇酎

上人錄寄彥禮彥
冲原仲諸公題詩

簞瓢可樂不淡薄蘭菊重生足滋茂他時有暇更分題
此游未落諸公後

送韓臨亨提舉

君有千里行我獨留此居君行赴何許沅江隔重湖我
留此山中欲去尚躊躇沅江道里僻罷民待君蘇君亦
憐其民溼沫勤煦濡涼風促君旆小雨膏君車漸去囂

塵遠及此夏景初野色望行路東門初首涂風土日已
好誰能懷舊廬舉手謝拘束有若縱壑魚路逢舊交游
相見問何如道我且貧病因風時寄書

和伯少穎迂仲將歸福唐偶成數詩欲奉寄無便
未果也辰叔常季南還因以奉送五首

紛紛走道途擾擾雜泥滓既為風俗移又以血氣使百
川灌河來夫豈有涯涘故人林與李始可與語此

方子獨立士

德順

歲暮亦深居林李從之游欲出更躊

踏紛華晚不顧浮湛同里閭時從陸丈人共此一篇書

諸公皆從
陸亦顏游

閩山固多奇閩士亦多傑弱水不勝舟有此積立鐵胡

劉守節意亦豈待言說

原仲致中

堂堂混衆流此固不得折

經時望子來慰我終歲病西行道路迂復見復未定秋

毫論得失此豈不有命嘗聞安身要其本在無競

王輔嗣卦

解去安身莫若無競修己莫若自保
守道則福至求祿則辱來實法言

才叔策名時已自能不動中年謫南荒與世作梁棟生

平所踐履自待九鼎重失固不足言得亦何所用

才叔
諫議

張公也初登科
時已無喜色矣

送范才元

風塵滿中原冠蓋走東南同時辟地人不存
二三相逢各衰病豈復能清談君今尚行役
未暇脫征衫聲名自宿昔文字性所耽誰能
隨少年下筆令人慙並海雖名郡嗜愛殊酸
鹹君但撫罷民未須嚴轡銜開堂宴賓客
清詩消半酣時寄荔子來尚能憐我饒自餘
君不問

只向鼻端參

贈魏邦達張彥素

公更深居我更衰山林膏壤偶同時
兩年疾病略相似
二老風流應自知苦學養生猶有累
不知閒過是無為
初冬寄遠無他物半夜才成一首詩

送南上人

閒居病益侵俗事初一掃南公犯寒來
為我畧傾倒
論詩已得妙不必在窮討我懶百慮廢
識子恨不早歸途

見徐董

明叔
彦光

更問此二老所恨聊復翁向者骨已槁

彦
速

拭目看遺文令人惡懷抱

南上人收二董詩
與明叔墨妙甚富

贈曾吉甫

荒城少往還居處喜相近欣然得一笑渠敢有不盡詞
源久欲竭此道或少進作氣在一鼓軍士況未慙涼風
動高梧塵土朝作陣臨溪惜暫別溪淺雨復吝豈無一
言贈以當百鎰贐沉綿我未瘳李君更須慎

贈魏邦達張彥素

橘綠冬未黃菊老霜變紫不知風土佳但覺日月駛閒
居得養疾調氣實在於此從今便休去敢復為物使誰能
明吾心旁邑有君子

次韻汪教授木犀

治藥呼醫懶出門每聞樂事漫消魂秋花帶雨寒猶在
老病尋詩日更昏但見晚霞翻雨脚不知山石是雲根
主人有意留巖桂要使貧交奉一尊

送詹慥秀才

予今來幾時歲月忽已晚今當別我去道里初不遠家
山霜正濃馬草寒更短何以奉親懽一笑和氣滿邇來
游學士已見如子罕讀書要躬行俗事不厭簡故鄉多
老儒歸日正可款時能寄餘論尚足起我懶兩州多便
人自可數往反

靜軒

紛紛逐人行擾擾與事競不知一世間能得幾人靜公
今默無語種種以靜勝人來漫相接事至聊復應開軒

道院旁足以補我病日高公事散轉與靜相稱千載師
蓋公此理久已證爐烟裊晴窓松聲韻鐘磬簿書勿勤
來公方在禪定

贈吳周保

舊琴無譜亦無絃子獨深求不許年正以安閒有餘地
不因言語悟先天論詩再到新刪後讀易仍窺未畫前
老病相逢聊一笑非關無地可逃禪

尹穡少稷方齋

人圓君方君但方鑿圓枘方君不忙富貴可取君則忘
閉門讀書聲琅琅舊書重疊堆在床點勘同異分偏傍
運精竭思心力強十年足不離僧房荒山野路秋水長
客雖欲來嫌路妨幽蘭無人為君芳采菊落英充饌糧
客雖不來有餘香

送義先上人歸古田

斷雲流水去無蹤回望關山指顧中何處尋君問消息
古田南路已春風

送范十八

范子閒行定不窮袖中詩卷敵清風野僧道士有餘意
同學故人多近功已辦辛勤十年讀時須談笑一尊同
相看又作韶州客却望臨川是夢中

徐師川挽詩三首

江西人物勝初未減前賢公獨為舉首人誰敢比肩時
雖在廊廟終亦返林泉今日西川路臨風更泫然

異日逢明主端居不復藏一心扶正道極力拯頽綱已

病猶軒豁臨衰更激昂始知操韞處餘事及文章

念昔從耆舊公知我獨深意猶如昨日愛不減南金撫
事思前作干時愧夙心素琴理舊曲無復有知音

即事六言七首

老來與世相忘尚喜攤書滿床憶得少年無事苦心更
學文章

少年與世無求老覺心情自由顛倒文章事業追隨倦
鳥虛舟

不入樂天歡會不隨淵明酒徒看取簞瓢陋巷十分晝
夜工夫

百壯艾能已疾一盃酒便生春熟睡覺時意思罷勞歇
後精神

游夏一辭不措非關未究源流直至孟軻沒後無人會
讀春秋

養生不能延年忘言未是安禪聖學工夫安在重尋曲
禮三千

畢竟學書不成誰道能詩有聲點檢平生交舊幾人曾
是同盟

揚雄

讀易先知未畫前聖人何事絕韋編始知揚子多閒暇
更有功夫草太玄

嚴君平

千秋蜀道一君平氣象從來不近名可惜下簾無一事
才將老子授諸生

賈誼

孔丘墨翟並稱賢始信先生學未堅何事退之傳此謬
亦將餘論點遺編

晉二絕

紛紛禮樂付浮埃一取玄虛禍始開但見出言齊老易
始知戎馬不虛來

晉朝朝士安知禮盡出紛紛篡賊餘漫使當時辟世士
放言高論祖浮虛

畜犬雪童點甚勝人壬戌夏暴死作詩傷之

他生與我有微因來見防家最後身
共住世間均是夢未因心境不如人
浮雲屢見本無迹又路多歧莫問津
此夜窮愁走南北更誰隨馬踏埃塵

伴我走道途直前無葛藤三年貧病裏
幾度送亡僧

又作二絕

荒山古寺欲黃昏梁上諸君欲到門
雨濕雪童埋處土向來精爽更誰論

客至書來總不知却緣邇日吠聲稀
蛛絲網通常行處猶道奔逃未肯歸

秋日

禦盜夫新死放生羊尚存有書消永日
無客到衡門山色熱猶好溪流雨不渾
還須止雜念數息度黃昏

懷雪童

老來于世漫多悲夢幻推移且自知
想得開山藏骨處却如搖尾乞憐時
送行識我貧無蓋閒坐思渠悶有詩

從此窮居添寂寞夜長誰復遶簾帷

即事

畏事成閒厭出遨故人不見如曹逃一寒一暑便衰老
如夢如幻無堅牢客游滾滾漫南北往事悠悠增鬱陶
此去還能安坐否割雞元不用牛刀

念舊

俛首思疇昔常期不負渠事隨心境轉人與舊情疎少
日猶相憶多年遂絕書况于生死隔寧復似年居

和汪教授

羨君鬚作綠坡竹飽飯我詩聲徹屋閉門不出動經旬
坐看禪房花柳簇却記冰霜動地時半夜小園風折木
一尊相對任濁清三徑閒行漫松菊長篇短句動盈軸
想像清香有餘馥問君何以得此妙未潤只緣山有玉
我窮猶敢和君詩不留和氣滿臍腹搜尋險韻少工夫
敢與諸公鬪遲速

癸亥歲正月二首

閒居足因循所至漫冬夏今年忽六十稍覺日有暇孔
子固大聖未害六十化同時蘧伯玉亦豈出此下莊周
與惠施初未識此話何因為此語百世呈縫罅不如姑
置之以俟一朝霸

孔子六十時入耳心則通所造不可知誰能強形容當
世設梯級聊發百世蒙如何陋巷顏年少兩頰紅出門
請從之便欲齊此翁心知路不遠試用一日功還家對
簞瓢此士正不窮

寄蔡伯世李良宇

兩君羈旅宦西蜀我亦江南住僧屋想像平生肺腑親
晴天何處飛黃鵠庾郎故是豐年玉道兒更是見不足
藜羹脫粟有餘味富貴薰天果非福死生契闊今誰在
往事悠悠陵谷改他年乘興下瞿塘見我衰顏莫驚怪
別尋好語和君詩償盡平生難韻債掃除壁土更焚香
下酒如今有鮭菜

贈魏承事二絕

雨漲溪渾欲斷橋水鄉風物轉蕭條煩君下筆留春住
令我寒窓不寂寥

四十餘年別歷陽舊游如夢費思量眼明見此老居士
聽話舊游如到鄉

送魏縣丞之官餘杭

君去我逾靜我病君得知如何便相遠未有再見期溪
橋已春晚紅紫久離披初無一尊酒慰君別後思君才
則甚長所用無不宜但當歛光芒匣劍深藏之初非擊

刺用肯顧庸人嗤平生富事業餘事尤長詩當官倘見
念琢句敢嫌遲上以寄難兄下以愈我饑

葉尚書普光明庵

日月豈不明明乃有昏晝四時所出火更自表新舊寧
知普光明亘古不傳授獨照萬物表不見所成就遠乃
包須彌近不間圭竇茫茫濁水源我此明亦透尚書所
居庵草木甚癯瘦收藏萬丈光歛退著懷袖至寶久不
耀却立萬夫後我願從公游昏病方待救先持此微言

遠寄為公壽

焦復州惟正寄鼎復兩州喜雨詩來以近體詩一

首寄之

聞道復州賢太守只如前在武陵時相逢未說為州樂

所至先傳喜雨詩行比曾參仍不魯

焦君居家以孝友稱

政同龔

遂更何疑懸知此去長閒暇定是愚民不敢欺

送范十八還江西效白樂天體

與君此別重依然再得相逢又幾年無使人言長似舊

況教人道不如前窮通軒輊皆由命貴賤高低總是天
只有脩身全屬我少遲留處更加鞭

晁公詩九經堂

人家有屋但堆錢君家有屋定不然一堂無物四壁立
六藝三傳相周旋人言君貧君不顧以此辛勤立門戶
聖人遺意要沉思暫脫楚騷辭漢賦他年相見問何如
且說九經得力處

送瑞印上人歸福州

不須布襪與行纏
叅得諸方五味禪
散盡白雲見明月
虛空只是水中天

東萊詩集卷十九

欽定四庫全書

東萊詩集卷二十

宋 呂本中 撰

尤美軒在玉山縣小葉村喻子才作尉時名之取
歐陽文忠公醉翁亭記所謂林壑尤美望之蔚
然者後數年舊軒既毀復作寺僧移軒山下汪
聖錫要詩叙本末因成數句寄之

茲軒在何許遠在洞巖側洞巖山水勝自與塵土隔天
以奉幽人寧肯媚過客尉曹昔吏隱到此若有獲名軒

曰尤美盡去眼界窄坐令歐陽公餘意轉明白車馬走
道路我久度此厄茫茫六合間於此有安宅軒雖有成
壞山本無異色舉頭見林壑不必更遠索

金雞董需彥光凌岑庵

我為江南游衰病轉不堪往來信撫間未上凌岑庵凌
岑賢主人清峻如山巖避事若荼苦守貧如薺甘平生
好交游十不存二三令弟又繼往世不聞清談高風故
絕俗想像令人慙浮生有欣戚此味久已諳請君但高

枕客來睡方酣茫茫岐路間與渠為指南乘風本餘事
不向鼻端參

盛華彥光丘壑軒

盛侯少時偉儀觀下筆不休人共歡胸中別自有丘壑
萬里溪山藏几案往來車馬開泥土盛侯何嘗著眼看
較量今古放同異抖擻胸襟別真贗今朝示我故人詩
老病窮愁得消散故人相繼在鬼錄君雖獨在飽憂患
且住溪南數間屋坐穩不憂時節換人言丘壑殊不惡

君守一丘只如昨文章老健氣如虹不向山巖何處著

送晁公慶西歸

頃從君家諸父游談經語道久未休死生契濶風塵起
往事追尋三十秋疾病衰頽且深坐喜見後生勤勝我
臨行索我送行詩短句長篇無不可少年學問要躬行
世人營營勿與爭閉戶忍窮心自樂簞食瓢飲殊不惡
紛紛得失誰厚薄得此失彼莫籌度

曾吉父橫碧軒

囂塵等山林此理久未盡君今住世網于此已自信僧
居隔長溪屋古柱礎潤不知市聲遠但覺山色近開軒
有餘地草木當夏盛一身船轉頭萬事燈落燼譬如癢
在體搔抑吾已認青山故在眼已絕對閉吝悠然有遐
想此語君所印

送邢道州趙邵州歸湖南

相逢不得款奈此別離何長塗已新秋從此風雨多欣
然出殘暑如鳥離網羅我獨此淹留衰病日婆婆跂足

望二子洞庭秋始波道州通家舊口辯如懸河邵州我
表弟玉也保不磨無由得相就相近日經過黃塵翻馬
足未暇眄庭柯何時寄書來與我消睡魔天涼不飲酒
為子一高歌

送方豐之秀才歸福唐

我居江東惟信之州子來自南而與我游問其所友一
時之秀其兄韞德亦既有就子學既立子志甚遠何以
終之止在不倦貧賤勿厭自然無悶富貴勿羨害德之

本彼古之人能聖與仁我胡不能歎其絕塵今子歸矣
歲亦有秋何以告子惟聖之求水流有源木生有根惟
源與根入德之門求聖根源惟正之守正之不守棄師
背友絲毫之偽勿萌于心無有內外亦無淺深由此則
聖舍此則病是以君子所守先正予以贈別亦以自警
為別後思且以三省

向敦武挽詩

耐官丞相後世固不無人位下能安命身閒不厭貧還

能死異域便足繼前塵此日何山路空悲草木新

向僉判母挽詞

懶作塵寰住虛隨雲雨還人皆欽懿範天不予長年室
靜如歸隱心安勝學禪傳家有令子尚得慰重泉

贈眼醫張子驥郎中

人生所有疾萬種皆眼病由眼不得明故視有不正指
白以為黑遠邇皆未定如何少醫膜遂失本來性今君
有妙手與世脫機穽病雖有多端但以一理勝不須望

奇功藥病自相應吾觀世間物唯眼為至淨不容著纖
毫況復計少剩自古大醫王其治有捷徑不能添汝明
但要除此症鏡有塵則昏塵本不在鏡塵去鏡自明豈
必與物競皎潔玉壺冰澄澈秋月瑩坦然望長途欲往
不待倩其說甚易知在汝聽不聽請君明其然說法我
已竟

送晁侍郎知撫州

與君相從四十載老病昏昏君不怪交游大半在鬼錄

一時輩行惟君在前年簪筆侍明光
論議風流傳梗槩
邇來同住此荒城
笑語瀾翻絕機械
薄酒重尋他日盟
新詩未了平生債
今君奉詔作鄰郡
共喜朝廷有除拜
定知惠政及斯民
一洗從來州郡隘
甕頭春色早晚熟
遠寄還須例霑丐
為君試草德政碑
蕭何自昔文無害
晁留臺劉夫人挽詩三首

自昔聞諸父文章漢兩京

原父侍讀貢父舍人夫人諱父也

風流傳壺

範烜赫振家聲睦族今無匹
能書舊得名如何江左郡

今日望銘旌

故家劉與魏我亦忝姻親

夫人劉姓魏出也

久矣思前作居然

愧後塵遺芳接惇史舊德見夫人
悵望鵝湖路新年草木春

留臺無恙日樂善出誠心文采不復見
聲名空至今半生資內助三歎有遺音
撫事思前輩于誰覓斷金

贈鄭侍郎

鄭公一勺酒時與故人傾
况茲冲和天草木日向榮山

茶逞獨艷著意呈軒楹坐中四五客還來尋此盟主人
久未厭頻得倒屣迎燒燭夜照花知公有餘情清歌洗
俗耳軟語令心醒豈伊鶴頂丹獨自能傾城要令同二
妙相伴作三英紛紛桃李花開謝略不停誰知此深院
別有高世名我老百事廢對此眼暫明還家不能寐起
坐數殘更明朝有新句更欲煩公聽

送宗紀上人歸福州

道人海上來訪我江外寺春風吹行李飄搖不得住手

中主人書足下千里路臨行請一語懇款遇外慕人生
未入道所至皆旅寓急參庭前栢會取末後句相逢與
相別惟此是先務

郡會分韻得蠻字

柳外高樓四面山使君攜客共躋攀塵埃不動日方永
桃李無言春自閒未厭簿書時到眼每逢詩酒亦怡顏
夜闌一倍園林勝尚覺清歌欠小蠻

郡會賞牡丹分韻得棠字

敢辭深坐懶衣裳便欲追陪恐病妨小戶長憂勸酒滿
短才仍怯和詩忙牡丹花在逢寒食羣玉山如望洛陽
不是使君尋舊賞更無人會憶姚黃

次蔡楠韻

交舊悠悠西復東建昌南望水連空蔡侯念我有新句
猶似灞橋風雪中

送王提舉赴淮東七首

君為千里行我此一室住清風隨畫舸已過江北路

君如暑伏冰所至自清靜脩然接新秋已復天地性
隨行萬卷書既足以自娛因知君所樂不在使者車
入門雖多塗其究有安宅君能識其然一語在物格
學道貴積習天地故相似不容有秋心毫髮在胸次
海陵我舊游歲月亦已久不知兵火後尚有昔人否
官閒有新作寄我莫憚遠兼書海陵事令我開病眼
送財用歸開化二首

年來相聚欲無言懶說諸方五味禪所恨歸程太匆遽

不收吾骨瘴江邊

疾病支離欲著床
爾來殊不負秋陽
頭童齒豁西風裏
尚費縈簾一炷香

謝范子儀見寄因次其韻

疾病深藏一事無
眼從昏澁廢看書
清詩忽覩驚人句
遠道如瞻使者車
頗放溪山時入座
不妨賓客醉騎驢
傳家事業風流在
早晚還朝得盡攄

謝周侍郎送木瓜

染以猩猩血綠以刺繡文天生此碩果似是百果君杯
槃快先覩便足張吾軍雅宜椽燭照正合侑金尊環橙
與大柑其從蓋如雲我病日已衰故人時見存晨興有
奇事此果蒙光分開緘見珍異坐使童僕奔把玩不去
手舉室生清芬所恨茅屋底著此大不倫瓊琚永不報
拙句聊相聞

謝幽巖長老送荔枝二首

年來疾病日衰頹咫尺閩山懶便回不是幽巖老尊宿

更無人寄荔枝來

荔子焦乾久未嘗今年霜下始聞香
幽巖闕畧菴前事容得先生為口忙

撫州俞隱居挽詩

臨川俞處士獨擅隱居名
懶倦不復出風流聞後生自
甘長寂寞肯作太鮮明
松栢新阡路傷心秋後聲

贈汪信民之子如愚

四海同門一信民
近淮來往七經春
生平坎壈不如意

死去聲名多悞人漫以文章付兒子略無毫髮仰交親
請君但自傳家學陋巷簞瓢莫道貧

謝曾台州送梅

不辭深坐轉衰頹養病仍無酒一杯尚喜故人相勞苦
臘前先送一枝梅

甕間吏部久不見江東步兵那得知故人憐我太寂寞
一枝梅送兩篇詩

送范子儀將漕湖北五首

君行欲何之乃在湖水北湖水多近縣使者易為德其民淳而古其吏朴且直官閑足賓客歲稔少盜賊得君清靜化用教不以力但自養根苗勿苦厭蟲螻

許昌無事時地固多英豪况君忠宣子譽望素已高讀書不出戶俛首自作勞脫身走江南始為時所褒每念其先人水靜絕波濤時從文字嬉餘事及風騷

忠宣在朝廷每欲消黨與以我廣大心盡使變齊魯同門有不察平地鬪豺虎君昔住許昌閉口不復吐靜思

前人意皆是神所許自守泥塗間肯復計齟齬

令兄守家學曰自文正始惟不卑小官至死而後已其間有富貴乃是偶然爾人欲學古人豈不識此理奈何厭貧賤乃不退就已君今又蹈之可為吾黨喜

我懶百事廢尚叨交舊知時蒙寄書來索我送行詩我詩老益退久為人所嗤君獨不見鄙論相不舉肥送君湖北去無事隔山陂時應有佳句尚足慰相思

梅花二首

白玉花頭碧玉枝水邊籬下雪晴時暗香別有關情處
却是春風未得知

占得先開不待春風饗雪虐長精神老人不是尋花看
要與尊罍洗世塵

周承務郎求諸已齋

為腹不為目貴久不貴速人皆求其餘我獨心易足人
皆重外慕我獨御其獨閉門想顏子默坐相追逐壽夭
有定分簞瓢乃其福脩身雖多途要在不遠復

送程伯禹歸浮梁

不見程公二十年上饒相遇各華顛平生氣節名先立
老去安閒我未然即看歸來上廊廟未容休歇住林泉
飽山閣上憑欄處合得逍遙第一篇

疾病因循懶出門茅簷終日坐昏昏雨聲點滴松藏寺
人迹稀疎犬吠村時得使君相勞苦勝于書札問寒溫
只應此去添憔悴又欠先生酒一尊

寄題王珉中玉通判夢山堂

青山甚不遠每因塵事疎百念攪胸次豈知山有無君
無適俗韻常似山中居出處本無二夢覺固不殊不知
此山堂始性從何途未嘗走道路亦不用舟車溪流與
山色相對若有餘此地甚閑曠如君心地初行雲映遠
樹中有此田廬如今遂安處始驗實不虛得非神所相
無乃道力扶親朋在左右不待折簡呼往來一笑樂勝
有十輪朱何須從范子辛苦泛五湖亦不學沮溺遠去
斯人徒從容萬事表在我不在渠欣然理前夢已勝在

華胥

去冬以紙衾遺劉彥冲劉有詩來謝以二絕句答
之

初無一物獻高人紙被封題意却真想得蒙頭忘百慮
滿山風雪自成春

錦繡堆床已不宜芬芳淑郁又成痴心知此被無他巧
能與山翁換好詩

送曾季直下第歸臨川

老病侵凌重別離
爾來瘦欲不勝衣
信州城北荒山寺
兩送親知下第歸

曾子不愁歸路泥
臨行索我送行詩
頭童齒豁衰頽甚
不似京城相別時

送趙十一弟之官南安

君為千里行
我有一尊酒
把酒持勸君
欲以為君壽
南安傍庾嶺
瘴癘亦時有
德人固天相
和氣生戶牖
斯民得安樂
如我屈伸肘
居然變遠俗
共感賢太守
我病居

上饒忽忽歲月久杜門百事廢亦復厭奔走得君暫相
從感嘆成皓首頗念河朔時相從誦詩否人生只此是
不必更抖擻有便即寄書頻來問衰朽

寄劉彥冲兼寄胡原仲劉致中

故人別去兩經冬今歲書來第幾封正以空疎少製作
不因窮約廢過從養生漫說終難效學道無心亦未逢
若問真歸是何處五更常聽寺樓鐘

去歲嘗以紙被竹簡遺劉致中後為大水所漂致

中有詩以二絕句荅之

念君無愛亦無求一室翛然冷欲秋尚恐深居有餘念
更將衾簡委洪流

紙被公無笑不才兩公相繼有詩來五更睡足天昏黑
也似他人錦繡堆

吳傳朋游絲書

君不見往時文學顧八分中郎之後典型存又不見先
朝文惠書堆墨大榜濃雲照南北未似只今上饒守靜

寫游絲不停手非烟非雲斷復續緩步徐行不拘束斷
崖一落千丈滑遶望筆行如一髮鬼神竭力覩不見鐵
礦消亡網作線線舞飛揚不自由縱橫自在勝銀鈎知
君此意非安排妙處不從筆下來心疑形釋萬事去信
手却立無纖埃滿堂回頭莫見猜我自悟此忘胸懷操
舟相馬在事外顏氏識此由心齋如君下筆少有意錦
繡寧不悞剪裁君惟無心故若此秋毫自可纏風雷鍾
王斂手謝不敏長史懷素慙哀頽病夫覩此心目開向

來窮愁安在哉

東萊詩集卷二十

東萊詩集後序

文集莫盛于唐亦莫盛于本朝唐則韓退之柳子厚本朝則歐陽文忠公實為之冠是數公固出類拔萃巍巍乎不可尚已編次而行于世退之則李漢子厚則夢得文忠公則東坡先生或其門人或其故舊又皆與數公深相知蓋知之不深則歲月先後是非去取往往顛倒錯亂不可以傳近世張文潛秦少游之流其遺文例遭此患知與不知之異也東萊呂公居仁以詩名一世使

山谷老人在其推稱宜不在陳無已下然即世多歷年
所而編次者竟無人為墨客詞人相視太息曰公所謂
知吾者希則我者貴歟儀真沈公宗師名卿之子少卓
犖有奇志方黨禁未解時不顧流俗專與元祐故家厚
公尤知之往來酬唱最多沈公之子公雅以通家子弟
從公游公稱之甚乾道初元幾就養吳郡時公雅自尚
書郎擢守是邦暇日裒集公詩略無遺者次第歲月為
二十通鋟板置之郡齋蓋公之知沈氏父子也深故公

雅編次之也備幾亦受知于公者也公雅用是屬幾題
其後竊自伏念與公皆生于元豐甲子又相與有連雅
相好也紹興辛亥幾避地柳州公在桂林是時年皆未
五十公之詩固已獨步海內幾亦妄意學作詩公一日
寄近詩來幾次其韻因作書請問句律公察我至誠教
我甚至且曰和章固佳本中猶竊以為少新意又曰詩
卷熟讀治擇工夫已勝而波瀾尚未闊欲波瀾之闊須
令規模宏放以涵養吾氣而後可規模既大波瀾自闊

少加治擇功已倍于古矣幾受而書諸紳今三十有六年顧視少作多可愧悔既老且病無復新功而公之墓木拱矣觀遺文為之絕歎因記公教我之言于篇末使後生知前輩相與情實如此且以見幾于公之言雖老不忘也乾道二年四月六日贛川曾幾題

